



Piere dal Polver

G: Dapò este injignà e?

P: Son injignà Giòchele.

G: Ben ades te conte. Chi egn... l'era, l'era vin Pozes, l'era na baraca che i brujèa èga de vita. Dapò l'é ruà un forest, no sé da olè, i ge dijea Piere dal Polver chi fascegn. Dapò l'à ciapà cà e... e zeche contrac che l'aea, col diaol o con sia mère, no sé. L jia dò reijes e l brujèa èga de vita e... capésceste? L brujèa èga de vita! Dapò cò l n'èa un picol barijel de sta èga de vita anzièna l se la tolea su na cracs e l vegnià, l jia a se la vener, ju de Pozes. E na bela outa l'é vegnù e, e canche l'é stat te Ciantrujan, a vegnir fora per Ciantrujan l'èa tant l gran peis che no l'era più bon de jir. Canche, l dajea la luna de net, l vèrda, l vedea l diaol sun sia cracs, con de gran cedenes che jia jù, capésceste? E... el no podea pussèr. Enfati l'é vegnù en fora e a zeche moda che l'à fat, l'é sutà sù e l'é sutà sa Bertol Fontèna i ge disc, i dijea i Fontènesc. E ló l'é sutà te stala e l'é sutà su per funé! L'é sutà... su per funé, e l'é sutà te stua e, i èa un gran Segnoredio te stua tacà sù. L se à, l se à sbraciolà dintorn chel Segnoredio e l'à preà aiut. Dapò i é suté chisc Fontènesc vin calonia, i à fat jir via no sé se don Piere o don Simon o un preve... Enfati l'é jit via e, emben i vedea... ic no à vedù l diaol, ic, ma i vedea un gran giat te dò usc de stua... neigher! Un gran giat neigher te dò usc de stua. E chest preve l l'à cacià e dapò l'à cognù sin jir. E dapò i dijea che l l'à miorà, noe? De chesta...

P: Strionament.

G: De chesta roba. Ma se l'é vera o no, no se sà. Ma dapò l'é sin jit e chest... e demez zaonder l se à indò metù da nef...

P: Col diaol.

G: Ei, col diaol. Ma dapò no se à più sentù che che l'à fat. Capésceste?

Giòchele Stochier (Giacomo Salvador, n. 1873). Intervista di Luigi Piccoliori, Penia, ca. 1960 (prima parte). Arch. ICL, Fondo Canori-Piccoliori 53_01.